

東

華

錄

東華錄

雍正二十二

臣王先謙敬編

周潤蕃恭校

雍正十一年癸丑春正月丁亥諭內閣川省爲產米之鄉歷來聽商賈販運從長江至楚以濟鄰省之用雍正九年巡撫憲德以川省米價稍昂又復展辦軍糈奏請暫禁商販此不過一時權宜之計至雍正十年川省收成豐稔米價平減憲德卽當奏請開禁乃至今照前禁遏以致米穀不能流通楚省不得川米之益甚非大臣公平辦事之道況目今江浙有需米之州縣望濟於楚省而該撫不令川米赴楚則鄰省何所資藉著卽傳諭憲德速弛米禁毋蹈遏糴之戒○戊子大學士等遵旨議覆浙江總督程元章奏海甯縣今年夏秋湖勢自東而西侵入仁和縣界石草各塘坍卸無

常勢甚危險等語查海東塘向有修築石草各工而西首見銜之
仁和縣界原係土工離杭城僅二三十里且與長安塘下河向北
一帶相距不遠設有疏虞建瓴而下有關杭嘉湖蘇松常六郡利
害自應速爲修築以備春伏大汎但各處塘工止有石土之分獨
甯邑又有草工者蓋緣其地沙活土浮潮頭往來接抉塘腳即使
大石鋪砌而上重下虛最易顛倒不得已修築草塘暫爲堵禦是
三項工程因時隨地各不可少但該督止稱各塘危險未經疏明
何項塘工無憑懸揣應令逐一詳勘即乘春閒水小時將應行補
葺修築之處酌動錢糧相機辦理其通盤形勢作何籌畫久遠之
法應俟特簡大臣前往查勘再行定議得旨著內大臣海望總督
李衛馳驛前往浙江會同總督程元章將海塘工程通盤相度形
勢籌畫事宜應作何修築以垂久遠之處詳細查勘悉心定議其

修築工程大理寺卿汪漋原任內閣學士張坦麟前往承辦仍照舊令程元章總統辦理張坦麟卽於本籍前往直隸總督印務署署刑部尙書唐執玉暫行署理營田觀察使顧琮協辦○庚寅命加賑江南沿海被水饑民四十日其鹽場竈戶亦照貧民例加賑一月○敕修江南范公隄○辛卯諭宗人府朕幼弟允祕秉心忠厚賦性和平素爲 皇考之所鍾愛數年以來在宮中讀書學識亦漸增長朕心嘉悅著封親王皇四子 皇五子弘晝年歲俱已二十外亦著封爲親王所有一切典禮著照例舉行○壬辰諭內閣各省學校之外地方大吏每有設立書院聚集生徒講誦肄業者朕臨御以來以教育人材爲念但稔聞書院之設實有裨益者少浮慕虛名者多是以未嘗敕令各省通行蓋欲徐徐有待而後頒降諭旨也近見各省大吏漸知崇尚實政不事沽名邀譽之

爲而讀書應舉者亦頗能屏去浮囂奔競之習則建立書院擇一省文行兼優之士讀書其中使之朝夕講誦整躬勵行有所成就俾遠近士子觀感奮發亦興賢育才之一道也督撫駐禁之所爲省會之地著該督撫商酌舉行各賜帑銀一千兩將來士子羣聚讀書須豫爲籌畫資其膏火以垂永久其不足者在於存入銀內支用封疆大臣等並有化導士子之職各宜殫心奉行黜浮崇實以廣國家菁莪棫樸之化則書院之設於士習文風有裨益而無流弊乃朕之所厚望也○調高其倬爲兩江總督尹繼善爲雲貴廣西總督○以陳宏謀爲雲南布政使由江南鹽道遷○予故禮部左侍郎蔡世遠祭葬○戊戌諭內閣大定副將楊馥統兵擊賊奮勇先登爲暗槍所傷其忠義之氣甚屬可嘉伊子楊恒新見在軍前技勇頗優亦甚有志氣著授爲游擊不必在軍前效力遇有游擊

缺出卽行題補平越營遊擊羅資袞以帶兵應援勇往被害深可憫惻伊子羅雲標見在隨征效力著授爲守備該督等酌量題補至楊馥羅資袞應得卹典俟事竣題報到日仍照例賞給○庚子命大學士伯鄂爾泰前往北路軍營經畧軍務○辛丑辦理軍機大臣等議覆靖邊大將軍順承親王參奏振武將軍傅爾丹在烏孫珠爾地方遇賊並未親身督陣以致兵丁懦怯回營原任副都統阿三推諉退縮一與賊遇卽行奔北等語應將傅爾丹阿三交三法司定擬具奏順承親王錫保不能籌畫指示應交宗人府議處得旨烏孫珠爾對壘情形朕曾細問額駢策凌傅爾丹情罪尙有可原從寬免其治罪著留軍營聽大將軍等調遣效力贖罪行走阿三前歲同陳泰貽誤軍機朕曾加恩免其治罪今據大將軍參奏情由甚屬可惡已在軍前取有確供交三法司定議具奏餘

依議○壬寅諭內閣甘涼肅等處兵丁本年應支糧料草束例應
折給銀兩自行採買朕因甘省年來辦理軍需食物昂貴兵丁所
領銀兩恐不敷用特令加倍增給以示格外之恩提鎮大員自應
體朕軫恤兵丁至意悉心料理加意愛養近聞弁員中尚有營私
贍徇凡於過往應酬及一切雜費俱於各兵攤派卽如甘提馬廠
每年尙有餘利若盡歸公用於兵丁不無稍補前任提督宋可進
止知罔利不恤兵艱剋扣餉銀濫用公帑各鎮將弁未必不倣倣
而行著署督劉於義侍郎杭奕祿嚴飭陝甘提鎮將營中所有除
各官俸薪及親丁名糧外凡有餘利俱歸公用接濟兵丁不得絲
毫乾沒入己亦不得借公費等項名色攤派署提督劉世明受恩
深重尤當實力奉行毋得仍蹈故轍自取罪戾嗣後弁員有私派
侵蝕等弊該署督等卽行參奏並將該管提鎮一併參處○命鑄

靖邊左右副將軍印二顆交大將軍收貯以備額駕策凌等調遣
滿洲蒙古兵丁之用○遣官賑札賴特貧民○丙午諭內閣國家
以制科取士原以覘士子所學而士子所學關乎世道人心是文
體之所繫固甚重也士子讀聖賢書果能講求明體達用之學則
以平日蘊蓄發爲文章自然法正理純得聖賢語氣可以傳世而
行遠此則有本之學有用之文爲國家所重賴者若不於根柢講
求而但以華靡相尚則連篇累牘皆屬浮詞聖賢精義既全無發
明聖賢語氣又毫不相肖國家亦安用此浮夸淺薄之士哉至於
二三場策論尤足覩經濟實學乃向來士子多不留心而衡文者
又每以經義已經入彀遂將策論濫收恕取不復加意閱看殊非
設科本意今會試伊邇著禮部先期曉諭應試士子於二三場文
藝均應努力殫心毋得潦草完卷試官如以限於時日不能細心

校閱後場不妨奏請展限務得眞才以收實用若所取試卷中有
經義可觀而策論疵繆荒疏者朕惟於主考官是問○丁未 上
啟鑾謁 陵○戶部議准左副都御史三格奏自肅州以至哈密
計程一千五百餘里其間沙州安西等處向屬肅州道轄但該道
駐紮肅州事務甚繁於口外地方鞭長莫及且見在西安開墾屯
種又有吐魯番回民於瓜州安插須有大員就近彈壓撫綏教導
尤屬有益應添設安西兵備道一其原設之安西同知一移駐瓜
州辦理水利屯田與原設之靖遠通判以至四衛一所俱令該道
統轄從之○庚戌 上謁 昭西陵 孝陵 孝東陵回鑾○壬
子諭內閣朕躬謁 陵寢見沿途地方安設水缸甚多或動支錢
糧或派用民力著查明具奏地方官職司民牧當以休養百姓爲
務若止以灑道清塵爲迎合朕心之舉錯謬已甚鑾輿所過卽畧

有塵土亦復何礙伊等於此等處過於用心轉被朕之譴責何不以此用之於民生吏治重受朕之嘉獎耶一併傳諭知之

二月癸丑朔

上還京師

○四川建昌總兵官趙儒奏紫古喇兒

斯堡等處賊番狂逞不法殺害廠商臣卒領官兵於九月初六日自建昌分路進剿攻克番寨六十餘處擒獲首兇十二月十一日

撤兵得旨嘉獎下部議敍

○賑濟杜爾伯特災荒戶口並賞賚耕

牛籽種

○乙卯以葛森爲盛京戶部侍郎

原任雲南布政使

○己未 上

御經筵

○封二十四阿哥允祕爲和碩誠親王

皇四子 爲

和碩寶親王

皇五子弘晝爲和碩和親王

○以慶復爲工部尚書

內大臣公

○庚申諭內閣古云兵可百年不用不可一日不備所謂備

者非徒操練技勇演習行陣而已如馬匹軍裝礮火器械軍行必需之物一一豫備於平時有事調撥便可剋期起行不至拮据延

緩此乃設兵之本意也我國家承平日久武備漸弛年來朕屢降諭旨諄諄訓飭雖該管大臣等稍知以訓練爲務然馬力不足資裝器用俱不周每聞派遣之信勉強周章遷延時日所謂豫備者但有虛名而無實際此則該大臣所當深知痛改加意整理者又如營中有必需之匠役不得不酌量給與兵糧數名以資養贍而將弁等每多借此名目將水火夫役等人多占名糧又每將精壯兵丁多派爲親隨不令當差及遇頭目把總缺出卽於此內拔補以致荷戈持戟者差使繁多而不得上進之路朕向知此弊已屢降諭旨切加申飭近聞此風仍未全改亦著該管大臣嚴行查察毋得姑容又聞各營中間有公中餘利如甘州提標馬廠之類原係存公備用而該管將弁往往據爲已有收入私橐遇有過往應酬及營中雜費仍攤派兵丁而不卹其艱苦此弊尤當禁革今再

行曉諭儻敢視爲具文仍蹈前轍勿謂罰不加眾希冀苟免其情
罪輕者照例處分情罪重者必在本地正法○以吳士玉爲禮部
尚書涂天相爲左都御史仍兼理倉場侍郎事○予故禮部尚書
張大有祭葬謚文敬○辛酉晉封貝勒弘春爲多羅泰郡王○以
陝西布政使鄂昌協理陝西西安巡撫事○壬戌以戶部尚書彭
維新協辦內閣事○甲子諭理藩院喇嘛扎卜前年一聞賊信卽
駭然驚潰及戰於克爾森齊老地方棄軍奔往遊牧處所朕恐此
中別有情節令其來京訊問伊竟無一語置對甚屬怯懦無恥著
革去扎薩克和碩親王令伊弟德親扎布承襲撤回一佐領賞給
額駙策凌喇嘛扎卜著交該衙門議處尋議喇嘛扎卜係喀爾喀
部落親王盟長不思訓導屬人效力軍事應按律正法得旨喇嘛
扎卜理應照議治罪但伊祖親王善巴於喀爾喀等未定之先卽

輸誠歸順後於軍事甚屬效力是以聖祖仁皇帝加恩於喇嘛
扎卜備極愛養著從寬免死在京永遠監禁○以兩淮鹽政高斌
辦理江南副總河事○乙丑兵部議准直隸總督李衛奏易州地
方恭建萬年吉地原設易水營都司一把總二馬守兵二百三
十七名不敷差遣請添設中軍千總一馬兵十名守兵四十名從
之○癸酉裁雲南宣威州屬儻塘可渡驛丞改設可渡巡檢一兼
管二驛事○甲戌諭內閣從來天時之旱澇由於政治之闕失人
事著於下天道應於上感召之機捷於影響朕深明此理纖毫不
爽而刑獄爲民生休戚所關更爲緊要一有枉抑天氣卽爲之不
舒上年京師無雪今春雨澤又少朕心惶懼深恐用人行政之間
錯誤失當朝夕修省莫釋於懷朕觀各部院中惟刑部聲名不好
司員作弊胥吏逞姦道路之間人言噴噴海壽身爲尙書乃一部

之表率伊先懷挾私心何能使所屬之人奉公守法乎王國棟受朕深恩膺封疆之重寄乃伊在湖南浙江等任非水卽旱或遇蟲災厯厯可數及回刑部辦事而天時又有亢旱之象何其前後一轍如此伊心尙不知儆畏視爲泛常是漢軍汚下習氣全然未改也刑部職任何等重大而海壽王國棟之居心行事若此一任司官胥吏作奸犯科舞文弄法豈有不上干天和之理朕屢次諄切誠諭深望伊等愧悔悛改儻仍然執迷不悟朕惟有執國法以正其罪非第革職降罰而已刑部事務朕非不欲另派大臣清查經理然新派之大臣平時旣未練習科條一到豈能洞悉情弊展轉思維不得不仍於經歷之大臣是問著卽將大小事件應完結者完結應改正者改正種種弊端徹底釐剔務期正本清源毋再因循玩忽海壽王國棟二人尤須痛改前非力圖後效否則身試法

網亦無可如何也朕前躬謁
陵寢見沿途地方安設水缸甚多
比時詢問按察使寶啟瑛據奏係動支錢糧豫備者因卽降旨切
責將寶啟瑛交部議處今觀畿輔之地雨雪亦未均調寶啟瑛爲
職掌刑名之大員而識見庸陋如此則聽斷獄鞫之際必有不得
其當者安得不加儆懼爾等部院大臣俱有辦事之責刑部固爲
刑名總匯而各部事務與刑名相關涉者亦多如戶部錢糧之虧
欠工部工程之查覈吏部兵部員弁之考成皆有處分及交送刑
部之件諸大臣俱應慎重周詳小心敬謹以懔天戒朕之用人行
政如有錯誤諸大臣科道等卽當切實指陳直言無隱朕之省身
思過實出至誠若少有從事虛文之意是自欺以欺天矣尙敢冀
天心之感格乎文武大臣科道等官向有輪班條奏之例近年以
來軍務殷繁暫時停止恐耳目未周下情或有壅於上達者著仍

照前例輪班條奏○丙子賚厄爾得尼招破賊官兵銀九萬九千
餘兩○刑部等衙門遵旨議奏原任副都統阿三於大將軍調遣
時託故後期遇賊奔北貽誤軍機應卽於軍前正法從之○丁丑
移湖南澧州嘉山鎮巡檢駐津市○庚辰改直隸永平府司獄司
爲巡檢移駐喜峯口○是月免江南徐州豐縣等六州縣雍正九
年江西清江等三縣雍正十年水災額賦有差

三月壬午朔諭辦理軍機大臣等西藏駐紮弁兵本爲保護唐古
特人等以防準噶爾賊夷侵犯而設比來賊夷大敗徒步奔逃力
蹙勢窮不能遠涉藏地則其無力進兵可知且頗羅彌輸誠效力
唐古特之兵亦較前氣壯見今藏地無事兵丁多集則米穀錢糧
一切費用等項雖給自內地而唐古特人等不免解送之勞朕意
量其足以防守藏地留兵數百名餘者盡行撤回其留藏之兵著

總兵官周起鳳帶領駐紮青保馬喇苗壽著總理藏務至此項兵應撤若干應否將駐紮又木多之雲南兵丁一併撤回著詳議具奏尋議西藏居住之四川二千兵內應留兵五百名爲該地守護之用餘俱撤回原處三年後仍於四川官兵內派換其又木多居住之雲南兵一千名原爲救援藏兵而設今應撤回五百名照四川兵丁之例三年更換從之○乙酉大學士張廷玉奏一請酌定分別監禁之例國家設立監獄原以收禁重罪之人是以各省人犯罪重者桎梏收禁罪輕者取保看守獨刑部衙門遇八旗部院步軍統領以及五城御史等交送人犯不論曾經奏聞與否亦不論情事之大小罪犯之首從一經鎖送卽行收禁候審致獄吏欺陵嚇詐諸弊叢生及至定案重犯少而輕犯多甚有審係無辜應行釋放而一時干累困頓備嘗請敕九卿定議嗣後凡各衙門送

部人犯何等應行收禁何等應行取保分別定例遵行一請詳慎
引例之條律例之文各有本旨而刑部引用往往刪去前後文詞
止摘中間數語卽以所斷之罪承之甚有求其彷彿比照定議者
或避輕就重或避重就輕高下其手率由此起夫都察院大理寺
與刑部同爲法司衙門若刑部引例不確應令院寺駁查改正駁
而不改卽令題參如院寺扶同蒙混或草率從事請卽將院寺官
員一併加以處分得旨九卿確議具奏尋議凡各衙門見獲人犯
該徒罪以上者於送部時務將案內干連人犯情罪重輕聲明文
內以便分別收禁其杖笞等案各自訊明發落完結毋庸送部儻
各衙門將輕罪人犯混行交送刑部卽行駁回或刑部司員混行
收禁以致拖累無辜者該堂官查出卽行題參交部議處又凡引
用律例務必情罪相符如律內數事共爲一條輕重互見仍聽止

引所犯本罪若一條止斷一事不得任意刪減或律例無可引用援引別條比附者應令於疏內聲明律無正條今比照某例科斷儻承審官仍前玩忽援引失實及律例本有正條而故引別條出入人罪該堂官查出將承審之司員題參書吏嚴拏究審各照本律治罪至三法司衙門理宜一體詳慎嗣後凡應法司會審事件刑部引例不確院寺卽查明律例改正儻院寺駁改猶未允協三法司堂官會同妥議如院寺扶同蒙混別經發覺將院寺官員一併交部議處從之○丙戌諭內閣雲南貴州廣東廣西四川福建六省舉人赴京會試郵程遙遠非近省可比朕意欲於落卷中擇其文尚可觀而人材可用者添取數人候旨錄用以昭朕格外加恩之意著傳諭主考官於六首試卷遵旨取中外其次等可取之卷不拘數目秉公選出俟發榜後朕另派大臣會同主考官驗看

人材更加遴選再六省下第舉子內除願與下科會試者著在禮部報名一併交與派出之大臣主考官揀選奏聞請旨○丁亥上親耕耤田○乙丑理藩院參奏土默特輔國公沙津達賴前於和通胡爾哈地方臨陣遁歸又於烏孫珠爾地方對敵挫衄請革去公爵得旨沙津達賴著革去輔國公在軍前效力贖罪○癸巳吏部議准前署兩江總督尹繼善奏改設府縣事宜一江蘇直隸徐州改爲徐州府設知府一附郭增置一縣設知縣一與原轄之豐沛蕭碭四縣及邳州睢甯宿遷三州縣俱歸府轄改淮安府分駐徐州之河務同知爲徐州府河務同知添設糧鹽捕通判一經厯一改徐州原設之鹽捕河務州同爲新縣糧河縣丞吏目爲典史南岸州判爲南岸主簿北岸州判爲北岸主簿改州學正爲府教授以徐州原設之訓導改管新縣學一鳳陽府屬之壽州請分

置一縣設知縣一典史一以壽州原設之訓導分管縣學並添設定遠縣屬池河驛巡檢一從之尋定徐州附郭縣曰銅山壽州分設縣曰鳳臺○丁酉戶部議准廣東總督鄂彌達奏程鄉縣改爲直隸州統轄興甯長樂平遠鎮平四縣惠州協之興甯都司改歸潮州鎮轄移潮州鎮左營遊擊駐紮新州右營遊擊一專防揭陽縣城從之尋定程鄉新改直隸州曰嘉應○戊戌諭內閣朕統御中外一視同仁凡番族人等有逆奉法紀行誠效力者無不厚加恩澤如四川口外之疊爾格土目等奉公道事上年已頒諭旨從優賞賚其打箭爐之明正裏塘等土司土知及頭目人等歸誠內附十數年來謹守住牧奉法急公凡兵丁赴藏駐防經行該地番民等遞運糧石供應承辦雖按數給發腳價不使擾累而伊等效力奔走於一切差使並無遲誤勑勞恭順甚屬可嘉應厚加恩賞

以示獎勵又聞土民中有生計艱難者亦應加賞卽俾得並沐恩
施其如何分別賞賚之處著查議具奏尋議四川各番部中明正
一部最爲恭順土司土婦效力尤多請各賞綵段十匹所屬頭目
人等賞銀二千兩其裏塘巴塘乍了又木多四部宣撫司以下應
賞綵段自十匹至六匹以次酌給所屬頭目人等每部賞銀一千
兩黎烏齊羅隆宗說板多冰壩四番部土司大胡土克圖以下應
賞綵段自八匹至四匹以次酌給所屬頭目人等每部賞銀六百
兩至各部番民內有生計艱難者行令該督黃廷桂委員會同該
土司等查明動帑賞恤從之○召唐綏祖來京以吳騫爲山東按
察使由廣州府遷○王寅諭內閣 太廟享祀向無上香之儀朕意
應確議增添至奠帛獻爵時朕意應行跪禮著大學士會同禮部
酌古準今敬謹定議具奏尋議漢唐以前尚仍三代炳肅之禮至

宋時始有上香之儀並於每位前跪三上香奠帛獻爵亦如之爵以三獻明洪武定制無上香奠帛之儀爵兩獻亦不跪至嘉靖時始改從宋制本朝會典因洪武所定而酌增之是以有奠帛有三獻爵而無上香之儀臣等敬謹詳議大祀莫重於郊壇而孝享莫尊於崇配至宗廟之禮宜與社稷壇同查祭社稷壇時皇上親詣大社大稷前跪上香則太廟自應一例請嗣後享祀太廟皇上詣太祖高皇帝位前跪三上香太宗世祖聖祖位前亦如之分獻官亦詣兩廡跪上香其祫祭及太廟後殿奉先殿儀亦如之至奠帛獻爵之禮太廟社稷俱不親獻是以皇上於拜位前恭立所以亞於郊壇也應請仍照舊儀行從之○癸卯子故禮部尙書吳士玉祭葬諡文恪○甲辰裁安徽鳳陽關稅大使一○予故刑部尙書署直隸總督

唐教王祭葬○丁未以副都統覺羅佛凝敍兼內閣學士裏行○

戊申以巴顏泰爲內閣學士

由內閣侍讀學士遷

○庚戌以徐杞署陝西布政使

由通政司左參議署

○裁湖北歸州屬南遷巡檢牛口巡檢興山

縣屬高雞寨巡檢長陽縣屬蹇家園巡檢各一○是月免直隸薊州蠡縣等七州縣江南通泰淮三分司所屬豐利等二十五場雍

正十年水災賦課有差

夏四月壬子朔諭內閣今日諸臣進殿試卷朕閱至第五本字畫
端楷策內公忠體國一條云僚采之際善則相勸過則相規無詐
無虞必誠必信則同官一體也內外亦一體也而至於百司庶
職何莫非臂指手足之相關數語極爲懇摯頗得古大臣之風因
拔置一甲三名及拆號乃大學士張廷玉之子張若靄朕心深爲
嘉悅蓋大臣子弟能知忠君愛國之心異日必能爲國家抒誠宣

力大學士張英立朝數十年清忠和厚終始不渝張廷玉朝夕在朕左右勤勞翊贊時時以堯舜期朕朕亦以皋夔期之張若靄稟承家教兼之世德所鍾故能若此因遣人往諭張廷玉使知朕實出至公非以大臣之子而有意甄拔乃張廷玉進見再三懇辭以爲天下人才眾多三年大比莫不望爲鼎甲臣蒙恩見居政府而臣子張若靄登一甲三名占寒士之先於心質有不安儻蒙皇恩名列二甲已爲榮幸朕以伊家忠藪積德有此佳子弟中一鼎甲亦人所共服何必遜讓張廷玉跪奏云皇上至公以臣子一日之長蒙拔鼎甲但臣家已備沐恩榮臣願讓與天下寒士求皇上憐臣愚衷若君恩祖德佑庇臣子留其福分以爲將來上進之階更爲美事陳奏之時情詞懇至朕不得不勉從其請著將張若靄改爲二甲一名以表大臣謙謹之誠並昭國家制科盛事令普天下

士子共知之○諭任啟運授爲翰林在阿哥書房行走于開泰焦
以敬吳超桑調元李光型劉學祖著賜進士補入殿試榜○查勘
浙江海塘內大臣海望等奏查浙省江海情形其門戶有三省城
東南龜赭兩山之間名曰南大亹禪機河莊兩山之間名曰中小
亹河莊山之北甯邑海塘之南名曰北大亹此三亹之形勢也今
南大亹早已淤成平陸數十年前水由中小亹出入後漸徙流北
大亹年來北大亹之桑田廬舍已成滄海若欲遏江海之狂瀾仍
歸中道恐非人力所能爲者查海甯東南有尖山聳峙鎮鎮海口
其西有小山俗名塌山相去百餘丈見今江水大溜緊貼北塘直
趨尖山塌山之間而海潮激塘護沙日刷若於尖塌兩山之間俟
冬初水落修建石壩設法堵塞使江水海潮仍向外行則北岸護
沙可望復漲至於仁甯二邑海塘自華家衝以東尖山以西一帶

塘工有草塘條石塘塊石塘不等內有大學士朱軾於巡撫任內修築石塘五百丈完固無損又新建之條石塘尙屬整齊其餘草塘易於朽爛而石塊舊塘亦易於坍塌殊非經久奠安之計似應改建大石塘庶可垂諸永遠再請於海塘之內添設土備塘一道比之舊塘再高五六尺務於今年秋汎以前上緊趨築完工萬一風潮泛溢有此備塘抵禦似可以衛護民生咸成樂土得旨所議俱屬妥協著交部照所奏行朕思尖塌兩山之間建立石壩以堵水勢似類挑水壩之意所見固是若再於中小亹開窓引河一道分江流入海以減水勢似更有益從前雖經開窓復壅塞者皆因惜費省工之故今若加工開窓兩工並舉更覺妥備石壩建後即有漲沙而石塘亦可漸次改建以爲永遠之利其開窓引河之處著程元章會同汪灝張坦麟等相度地勢酌量辦理○癸丑賜陳

僕等三百二十八人進士及第有差○甲寅諭理藩院鄂爾多斯
郡王查木陽身爲副將軍並不將伊屬下精兵派出且遲延日期
疏脫兵丁甚屬不合著削去郡王授爲貝勒發往軍前效力贖罪
貝子齊旺班珠爾羅卜藏於伊屬下派兵時並不詳慎以致逃回
甚屬怠忽著降二等授爲輔國公○乙卯命嵇曾筠爲文華殿大
學士兼吏部尙書仍管江南河道總督事調劉於義爲吏部尙書
仍署陝西總督以涂天相爲刑部尙書張照爲左都御史馮景夏
爲刑部左侍郎由左副都御史遷○以吳襄爲禮部尙書鄧鍾岳爲禮部
右侍郎由內閣學士遷○以高起爲兵部右侍郎由光祿寺少卿遷楊超曾爲倉
場侍郎由奉天府尹遷○戊午諭辦理軍機大臣等從來造作言語煽
惑人心者律有不赦之條若在軍前造言傳播其罪更重應照軍
法卽正典刑此自古相傳之憲典也數年以來西北兩路用兵征

討準噶爾該管大臣官員等居心怠忽辦事粗疏號令不嚴稽察
不密聞有不肖之人在軍營各處捏造全無影響之談或稱京師
近有某事或稱某營近有某事一人倡先眾口附和愚昧之人不
能辨別信以爲實而該管之官員大臣等雖心知其非往往以爲
難於根究希圖省事置之不問遂致若輩肆口流傳全無忌憚又
有從軍營回來之人造作言語以惑亂在京之聽聞如此等事不
但有妨於公務亦且大害於人心不可不嚴加禁約著行文各路
將軍令其詳細曉諭該管弁兵及跟役買賣人等嗣後儻有造作
浮言者必將爲首之人究出姓名奏聞請旨卽於本處正法示眾
其失於覺察之該管官弁一併治罪若能查出參奏免其議處至
在京造言生事之人交與步軍統領八旗大臣五城御史順天府
先期曉諭儻怙惡不悛卽行查拏從重治罪○諭朕從前以俟馬

蘭泰於去年賊至推河時領兵截殺奮勇成功故將伊調回留朕
左右令其學習辦事近聞軍前人等俱喧傳馬蘭泰一聞賊至甚
是畏怯喀爾喀協理台吉孫都布再四跪請出戰始行遣往馬蘭
泰出營行未二十里卽回朕將此問之馬蘭泰據奏係人捏造陷
害之語此事日後自有分曉馬蘭泰軍前事務尙未完結著仍往
紅郭爾鄂隆地方督兵操演效力行走公豐盛額不必前去○添
設山西大同府同知一駐府城朔平府通判一駐左雲縣應州安
東巡檢一駐口前村○移廣東遂溪縣湛川司巡檢駐東海白鵠
寨把總駐東山汎○己未諭內閣國家聲教覃敷人文蔚起加恩
科目樂育羣才彬彬乎盛矣朕惟博學鴻詞之科所以待卓越淹
通之士俾之黼黻皇猷潤色鴻業膺著作之任備顧問之選 聖
祖仁皇帝康熙十七年特詔內外大臣薦舉博學鴻詞召試授職

一時名儒碩彥多與其選得人號爲極盛迄今數十年來館閣詞林儲才雖廣而宏通博雅淹貫古今者未嘗廣爲搜羅以示鼓勵自古文教修明之日必有瑰奇大雅之才況蒙聖祖仁皇帝六十餘年壽考作人之盛涵濡教澤薄海從風朕延攬維殷闢門籲俊敦崇實學諭旨屢頒宜有品行端醇文才優贍枕經藉史殫見治聞足稱博學鴻詞之選者所當特修曠典嘉與旁求除見任翰詹官員無庸再膺薦舉外其他已仕未仕之人在京著滿漢三品以上各舉所知彙送內閣在外著督撫會同該學政悉心體訪遴選考驗保題送部轉交內閣務期虛公詳慎搜拔眞才朕將臨軒親試優加錄用廣示興賢之典茂昭稽古之榮應行事宜著大學士九卿會議具奏○庚申辦理軍機大臣等議覆靖邊大將軍順承親王錫保等奏察罕叟爾地當阿爾泰數路通衢極爲緊要建

設城垣駐防大兵於今多年因柴草不敷是以移駐阿爾達爾托羅海後因柴草亦不敷用於去年又移至烏里雅蘇台此外所有厄得爾齊德爾特爾啟塔米爾等處雖地方寬闊俱係杭愛山陽殊近內地又特斯等處僻在迤北儻逆賊由南路來犯邀截抵禦呼應不靈俱不便屯駐大兵見今移駐之烏里雅蘇台山頭各建礮臺滿洲蒙古大兵駐在左近且特斯台錫里又各有兵一萬駐紮甚屬鞏固賊兵斷不能逼近城垣應請於烏里雅蘇台地方內外植木中實土塊建造城垣於城內建設倉庫明歲青草生時調集官駝將察罕叟爾所貯錢糧米石軍裝火藥等項陸續運送從之○辛酉辦理軍機大臣等遵旨議奏據靖邊大將軍順承親王錫保經畧軍務大學士伯鄂爾泰奏稱達爾濟身爲將軍並不將兵丁馬匹沿途加意牧放以致疏忽傷損及至扎克拜達里克聞

賊人敗遁之信並不截剿及將馬匹盡行趕至營內復致虧損坐視賊遁又不尾後追剿及賊人去後始博追擊之名又卽行歸營回奏時乃借端巧飾情屬可惡請將達爾濟交部嚴加議處得旨達爾濟著革職令爲護軍交與順承親王凡有苦差效力之處令其前往贖罪行走達爾濟員缺著護軍統領吉當阿前往推河領兵駐紮○壬戌諭王大臣等朕前聞武格在巴爾庫爾軍營捏造撤兵之說口稱吐魯番回民搬至內地安插卽將巴爾庫爾之兵全行搬至布隆吉爾一帶駐紮以致軍營弁兵各懷退撤之心不思馳勉效力又武格在營諸事怠忽凡遇操演從未親加查閱朕所聞如此武格身膺領兵之任乃以訛言惑眾重違軍紀若留在軍營恐滋事端是以特降諭旨將武格革職拏解來京嚴加訊問嗣據署大將軍查郎阿奏稱武格向張廣泗云署大將軍曾具奏

欲派兵襲擊旨意不允已授倉場侍郎岳爾岱爲大將軍來營料
理張廣泗以爲必無之事而武格猶堅稱係參贊大臣顧魯告知
親見硃批奏摺等語朕隨卽降旨令查郎阿詢問顧魯據查郎阿
奏顧魯呈稱顧魯在營最久軍令捏造謠言罪在不赦豈敢以毫
無影響之事憑空捏造告知武格等語武格受朕深恩由侍衛參
領之職擢用至侍郎巡撫前因西路領兵滿洲大員甚少武格平
素似尙有勇畧是以召令進京畀以將軍重任乃伊一到京師神
氣改常朕卽面加訓飭伊又奏稱馬爾泰不勝巡撫之任此乃希
冀復爲陝撫之意因朕未遂其願心懷怨望勉強前赴軍營朕猶
冀其感恩宣力特升爲工部尙書乃伊全無人心視軍機重務如
同臘外且時存退縮之念奏報俱屬子虛又將賞賚兵丁皮衣皮
帽等項止量行散給其餘俱留貯軍營以致恩不下逮今竟敢捏

造全無影響之事矢口傳述冀以擾亂軍務煽惑人心從來造言生事者律有不赦之條按以軍法決不待時況假稱朕旨其罪更甚著王大臣等一一嚴訊確供具奏○癸亥增張家口筆帖式一駐和爾科○甲子以阿成阿爲鑲黃旗護軍統領鄂爾賽爲左副都御史由御史遷○實授高維新四川按察使○乙丑諭刑部向來直隸盜案往往多於他省朕以畿輔重地理宜倍加清肅乃皆小肆行如此不得不嚴加懲創以示儆戒是以豫先屢次曉諭然後定例於雍正八年爲始將盜夥不分首從皆行正法此朕辟以止辟不得已之苦心也近年以來直隸盜案較前減少是小人頗知畏法朕仍可遵奉 皇考法外施仁之意從寬辦理矣著將直隸盜案仿照各省分別法無可貸情有可原定擬具奏備奸民玩法日後盜案復多朕必仍照不分首從皆斬之例行若各省盜案有加

多於平日者亦照不分首從之例行著各該地方有司通行曉諭務使遠鄉僻壤之民共知之○戊辰工部等衙門議准內大臣海望等奏浙江省修建海塘事宜一分管工程人員請酌量揀選派委辦事工竣之日分別等第保題議敘一應給工價請銀米兼發於米賤地方委員採買糧石運至工所搭放庶夫匠雲集本地米價不至昂貴一添設官兵宜專責成請設副使道一員加以海防兵備職銜海塘文武官兵聽其調用並兼轄沿海州縣等官又海防同知原設二員請添設一員俱令分管塘工兼轄兵役再添設守備二員分爲左右營管轄千總四員把總八員外委十六員兵一千名以備調遣一官兵宜分派駐紮查海甯爲沿海數縣適中之地新設道員請駐紮海甯乍浦同知仍照舊駐紮其舊設同知一員請駐紮海甯新設同知一員駐紮仁和左營守備駐紮海甯之一

東右營守備駐紮海甯之西各分界址派防塘汛從之○庚午辦理軍機大臣等遵旨議覆署甯遠大將軍查郎阿參奏巴爾庫爾軍營駐紮重兵揆濟與無克克兩處卡倫俱係亂山環繞路徑錯雜最易藏奸是以專派副將紀成斌在揆濟駐紮總兵張元佐在無克克駐紮乃紀成斌等漫無查察一任賊人藏住亂山暗行窺伺在揆濟卡倫白楊溝等處劫掠糧車一輛空車四輛及車石人等由陶賴庫免爾庫逸去所有副將紀成斌等之抗違玩誤及總兵張元佐等任意疏忽理合據實參奏查紀成斌負恩縱賊漫視軍務相應請旨革職按律究擬張元佐等請一併交部察議得旨依議紀成斌著革職交三法司覈擬具奏○王申諭吏部部屬官員有告假期滿及丁憂起復緣事開復者定例俱於單月俟有本部缺出補用而本部出缺未必適逢單月之期所以候補各員有

待至經年累月者朕思告假期滿及緣事開復人員自應遵照定例等候單雙月之缺若丁憂起復之員亦拘此例於情理未協嗣後著不論單雙月遇有本部缺出卽行補用將此永著爲例○以孫國璽爲左副都御史王士俊兼管河南巡撫事河東總督○以方苞爲內閣學士由翰林院侍講學士遷○兵部議准四川總督黃廷柱奏三渡河新闢苗疆地方遼闊請於河西之七里堡添設參將一守備二千總四把總八馬步兵一千二百名酌量分駐廟頂磧多等處河東之瓦尾虛郎二處各設都司一千總一把總二馬步兵四百名酌量分駐黑礮山白宿凹等處再移甯遠府廠務同知駐紮七兒堡添設冕甯縣縣丞一駐紮瓦尾專理苗疆事宜從之○丁丑添設兩廣鹽運使司運判一駐廣東合浦縣石康地方移廣東順德縣縣丞駐容奇鄉○戊寅添設太常寺贊禮郎八○己卯諭內閣朕

覽本朝人刊寫書籍凡遇胡虜夷狄等字每作空白又或改易形聲如以夷爲彝以虜爲鹵之類殊不可解揣其意蓋爲本朝忌諱避之以明其敬慎不知此固背理犯義不敬之甚者也夫中外者地所畫之境也上下者天所定之分也我朝肇基東海之濱統一諸國君臨天下所承之統堯舜以來中外一家之統也所用之人大小文武中外一家之人也所行之政禮樂征伐中外一家之政也內而直隸各省臣民外而蒙古極邊諸部落以及海澨山陬梯航納貢異域遐方莫不尊親奉以爲主乃復追溯開創帝業之地目爲外夷以爲宜諱於文字之間是徒辨地境之中外而竟忘天分之上下不且背謬已極哉孟子曰舜東夷之人也文王西夷之人也舜古之聖帝而孟子以爲夷文王周室受命之祖孟子爲周之臣子亦以文王爲夷然則夷之字據不過方域之名自古聖賢

不以爲諱也至以虜之一字加之本朝尤爲錯謬漢書注曰生得曰虜謂生得其人以索貫而拘之也敵國分隔互相訛詆北人以南爲島夷南人以北爲索虜漢唐宋元明邊烽不息每於不能臣服之國指之爲虜我滿洲居東海之濱若言東夷之人則可令普天之下率土皆臣雖窮邊遠徼我朝猶不忍以虜視之惟準噶爾背天逆命自棄於王化之外或可呼之爲胡虜耳總之帝王之承天御宇中外一家上下一體君父臣子之分定於天尊親忠孝之情根於性未聞臣子之於君父合體同心猶可以絲毫形迹相歧視者也我朝正位建極百年於茲列聖相承功德隆盛世祖章皇帝入撫中夏救斯民於水火而登之祚席仁心仁政洋溢中國聖祖仁皇帝臨御六十餘年深仁厚澤淪肌浹髓中國之聖主自堯舜以來能倫比者有幾朕以涼德續承統緒勤求治理勉

效

祖考雖未能跂及萬一然十載之秉公矢誠朗如天日滿漢

蒙古並無歧視此心久爲臣民所共曉夫滿漢名色猶直省之各

有籍貫並非中外之分別也若昧於君臣之義不體

列聖撫育中外廓然大公之盛心猶泥滿漢之形迹於文藝紀載閒刪改夷

虜諸字以避忌諱將以此爲臣子之尊敬君父乎不知卽此一念

已犯大不敬之罪矣嗣後臨文作字及刊刻書籍如仍蹈前轍將

此等字樣空白及更換者照大不敬律治罪各省該督撫學政有司欽遵張揭告示窮鄉僻壤咸使聞知其從前書籍若一槩責令

填補更換恐卷帙繁多或有遺漏而不肖官吏遂借不遵功令之

名致滋擾累著一併曉諭有情願填補更換者聽其自爲之○庚

辰諭辦理軍機大臣等家選兵丁前往軍營之時朕降恩旨凱旋之日將伊等妻子俱令出本主之家編爲另戶但各路軍營從征

人內亦有分檔開戶之人充當領催披甲者伊等久在軍營辛苦
效力甚屬可憫著各路軍營將軍大臣等將效力行走好者以伊
等姓名註冊俟大兵凱旋之日亦照家選兵丁例編爲另戶

五月辛巳朔調托時爲工部右侍郎以盛安爲刑部左侍郎由太
卿遷僕寺

○癸未諭翰林院敎習庶吉士所以造就人材使沈潛經籍涵
泳藝林可以典制誥之文鳴國家之盛也從前庶吉士皆就翰林
院讀書敎習大臣不時策勵是以身心約束學殖易增館閣之間
蔚然稱盛朕意今科選拔庶常仍令在衙門讀書俾敎習諸臣得
以朝夕訓課兼厚給廩餉資其膏火庶幾枕經席史文藻可觀克
稱詞臣珥筆之職其應查照前例及如何加與廩給之處著酌議
奏聞○甲申諭內閣翰林院編修張若靄庶吉士鄂容安鄂倫俱
著在辦理軍機處行走○署雲貴廣西總督高其倬奏普思逆賊

刀興國等勾結夷眾叛逆不法臣檄提臣蔡成貴總兵官董芳楊國華等統兵攻剿賊首刀興國及附賊之土目楊昌祿李世蕃等皆經擒斬梟示計前後擒獲要犯並賊眷共五百餘名斬殺逆賊三千六百餘名招出投誠男婦四萬二千六百餘名此外未獲逆賊據險負固見飭董芳窮搜嚴剿務盡根株得旨此次效力之官弁兵丁著分別議敘賞賚其陣亡帶傷者著照例加恩○丁亥調孫詔爲江西按察使以劉吳龍爲安徽按察使由光祿寺少卿遷○己丑諭內閣朕於直省地方偶遇災祲卽爲之寢食不甯豁租發粟截漕平糶多方撫恤務使貧民無一不得其所又念各該地方雖或收以歉薄豈無蓋藏豐裕之家伊等誼篤桑梓休戚相關若各人量力禦輸既可以展其睦姻任恤之情亦可以爲恤災扶困之助是以曾經降旨通行勸導然亦聽紳衿士庶自爲之不相強也近

聞直省地方捐貲周急好善樂施頗不乏人此誠鄉鄰風俗之美亦人心古處之一驗也此等良善之人應加恩澤以示褒嘉著各該督撫留心體察秉公確訪其捐助多者著具題議敘少者亦著地方大吏給與匾額並登記檔冊免其差徭以昭朕與人同善之至意○庚寅諭戶部各省州縣設立社倉原以便民濟用若遇應行借給之時該州縣一面申詳上司一面卽速舉行方可以濟閭閻之緩急儻其中有假捏虛冒等弊自難逃督撫之耳目聞直隸百姓借領社穀必待該督咨請部示而後准行往返動經數月小民懸待孔殷仍不免重利告貸之苦嗣後著該督李衡酌量定例變通辦理咨報存案○刑部等衙門議奏武格居心狡詐蓄志姦邪捏造毫無影響之事假稱諭旨惑亂士卒之心貽誤軍機重務負恩誤國情殊可惡應擬斬立決得旨武格著改爲應斬監候秋

後處決○乙未辦理軍機大臣等議准經畧軍務大學士伯鄂爾泰奏特斯台錫里二處駐紮兵丁原以截剿賊人今賊人大敗之後勢不再來此處似無庸駐兵明歲大兵前進阿爾泰乘機攻剿今歲交秋應緩行至科布多等處選擇水草連營駐紮則人畜不至勞苦其前往科布多時每人各給兩月口糧用官駝載往其餘八月口糧需用八萬石應交范毓齋陸續運往再特斯台錫里地方既無庸駐兵應行停止一處修堡請於扎布韓察罕鄂羅穆地方修築一堡照看臺站運路大兵進剿必須派兵接續應於塔奔托羅海額克阿拉爾默爾根錫納地方各駐兵四千名明歲大兵前進阿爾泰時卽令此兵前往科布多以候調遣此次進兵關緊要請令副將軍額駙策凌塔爾岱常德等前往會同辦理其掌管副將軍印信之人恭候 欽定得旨靖邊左副將軍印務著額

駙策凌掌管靖邊右副將軍印務著塔爾岱掌管副將軍常德著
與額駙策凌同行議政大臣永福著授爲內大臣與塔爾岱同行
餘依議○丁酉 大清會典告成○庚子改湖南茶陵州屬之小
集地方歸攸縣管轄復設攸縣鳳嶺巡檢一○壬寅辦理軍機大
臣等議准甯古塔將軍杜賚奏海島特門奇圖山等處綽敏等六
姓仰慕 皇仁傾心歸化每年納貢貂皮請施恩賞以示獎勸請
照例賞給嗣後六姓之人交該將軍處每姓各立頭目一人以爲
約束每年所貢貂皮分別解送從之○丙午諭禮部賢良祠之王
公大臣等著於本家各賜祭一壇○丁未免甘肅所屬本年應徵
額賦二十七萬餘兩○復設永定河北岸同知一○己酉刑部等
衙門議奏副將紀成斌從前失機縱賊卽應明正典刑蒙恩寬宥
仍留軍營效力業經奏委駐紮接濟卡倫乃毫無愧悔故違將令

一任賊人潛匿緊要隘口又不撥兵護送糧運以致車輛被劫竅其前後情罪有心僨事玩法負恩紀成斌應斬立決總兵張元佐應降三級調用仍留軍營效力贖罪得旨紀成斌本由行伍蒙聖祖仁皇帝恩擢至參將之職雍正元年朕因年羹堯保薦用爲副將旋卽補授總兵官特升提督實爲逾格之恩嗣因西陲用兵關繫重大協贊務得其人岳鍾琪薦其素嫻軍旅可以任用朕亦料其重受國恩自必力圖報效因委以協贊軍務之重寄雍正八年岳鍾琪進京陛見將軍印務令伊護理伊當此大任應益加敬謹悉心籌畫於緊要卡倫嚴密偵探思患豫防庶可上報國恩下稱職守詎伊昏庸懦怯玩愒性成以軍國大事視同膜外致賊人瞞其疏忽乘隙侵擾卡倫損傷將弁戕害士卒掠去馬駝羊隻槍礮器械口糧無算伊身在大營掌握重兵恐懼驚惶一籌莫展聽

賊資我馬駝器械得於次年侵犯北路是兩路軍營之被賊擾掠者皆紀成斌之貽害也彼時在廷大臣卽奏請將紀成斌明正典刑以肅軍紀朕猶予以自新之路特降諭旨暫緩治罪俟事竣再定實望其抒誠勉力稍贖前愆乃伊獲罪後在營一載仍無愧悔效力之心朕始降旨將伊革去提督降爲副將遇有差遣令其盡力行走若仍不知改悔必究前案重處所諭甚明伊若稍有人心自應感恩畏法洗滌肺腸以圖後效乃於雍正十年正月賊犯哈密之時同曹勦領兵堵截遇賊於二堡之西仍復退縮不前致賊免脫尙敢扶同曹勦捏報力戰蒙混掩飾今於伊駐防接濟卡倫又敢故違將令漠視軍務以致車輛被劫是紀成斌所至之地在在疏防無不失機養寇既不思從前獲罪之重大亦不念曲加寬宥之深恩冥頑不靈誤公償事竅其前後情罪實無可貸著署大

將軍等將紀成斌卽於軍營處斬以爲將弁失機縱賊負恩誤國者戒餘依議○移四川墾江縣新設縣丞駐高灘場梁山縣新設縣丞駐沙河鋪

六月丁巳命武弁中熟習水師之人毋得調補陸路以致用違其長○轉鄧鍾岳爲禮部左侍郎以張廷璐爲禮部右侍郎由詹事遷○戊午禮部議覆蘇祿國王臣母漢末母拉律林奏伊祖東王於明永樂年閒來朝歸至山東德州病故所有墳墓及子孫存留賙恤之處經今三百餘年廢墜已久懇請修理給復臣部行文山東巡撫飭查今據巡撫岳濬咨報前明永樂中蘇祿國東王巴都葛叭哈刺率眷來朝受封歸國歿於德州地方命有司營葬勒碑賜謚恭定長子都麻含歸國襲封次子安都祿三子溫哈喇留居德州守塋今墓在州城迤北神道享亭悉已坍頽其子孫以其祖名分

爲安溫二姓今德州祀典每歲額設銀八兩爲蘇祿王祭祀之需等語查蘇祿國遠隔重洋感戴皇上德化進表謝恩爲伊遠祖墳墓子孫懇請整理給復情詞懇切應如所請令山東巡撫轉飭德州地方官清查蘇祿國王墓址所有神道亭牌坊等項修葺整理於安溫二族之中遴取稍通文墨者各一人爲奉祀生給與頂帶永以爲例並知照該國王從之○己未諭內閣據署河南巡撫孫國璽奏豫省歷年耗羨銀兩除本地公事支用外見存司庫銀七十萬兩有奇又社倉存貯穀麥等項共計二十八萬石有奇等語從前提解耗羨本是澂清吏治休養民生之意屢經降旨此項出自民間若本地公用充裕之時朕仍當加恩本地官民使之霑被惠澤不令歸入公帑也今豫省存貯耗羨既有七十萬之多而該省官員等所得養廉又已敷用正當加惠閭閻俾令邀恩格

外著將河南本年地丁錢糧豁免四十萬兩卽以存貯之耗羨照數撥補還項該督王士俊可督率有司敬謹奉行大凡耗羨多餘之省該督撫藩司等往往不甚愛惜並不爲百姓計而存撙節之心若伊等留意民生儲蓄充盈亦可爲加惠編氓之助○庚申

皇子弘瞻生○辛酉諭大學士等劉貴人晉封爲嬪其應封字樣著選擬具奏尋封爲謙嬪○復設福建陸路提標右營前營福甯鎮標右營建甯城守左營漳州鎮標中營水師提標後營閩安協左營臺灣鎮標左營臺灣協左營千總各一督標右營福甯鎮標左營建甯城守左營連江營漳州鎮標左營海澄營雲霄營詔安營汀州鎮標右營邵武城守右營海壇鎮標右營閩安協右營烽火門臺灣鎮標左營臺灣協左營右營淡水營把總各一○甲子諭理藩院策旺扎布係西路喀爾喀汗兼副將軍乃與賊交戰畏

懼敗回擾動衆心患邊移居內地又並不約束屬下人等肆行偷盜官糧牲畜騷擾貿易人等甚玷國家養育之恩理應卽行正法但念伊祖父原係喀爾喀內之汗累代敬神朕不忍正法將策旺扎布從寬免死監禁○丙寅諭內閣從前雲貴廣西等處不法土司除首惡懲治外其餘人等則令安插內地給以房屋地畝俾得存養不至失所聞該省督撫等不卽留心經理遲至一二年後始撥給房地以爲養贍而地畝又相隔遙遠土司不能親自耕作惟賴該縣代徵糧穀賣銀移交每年非被佃戶侵收卽被胥吏中飽有名無實以致各土司饑餓困頓竟有私自逃匿者重負朕體恤生全之至意著通行曉諭有安插土司之地方令該督撫悉心稽查若有從前辦理不善之處卽行更改並飭有司等不時體察務令安全以受國家豢養之澤儻仍疏忽從事必嚴加議處○命李

衛往古北宣化等處賜兵以顧琮暫署直隸總督

由太常寺卿署

○庚午

諭內閣祀事修明國家令典孔子文廟春秋祭儀尤宜備物盡敬聞外州縣中有因荒裁減公費者朕思公費既減必致祭品簡畧或轉派累民閒二者均未可定著各省督撫查明所屬有因荒減費之州縣卽於存公銀內撥補以足原額務令粢盛豐潔以展朕肅將禋祀之誠其各懔遵毋忽○諭京師至江南數千餘里行旅絡繹朕於雍正七年特遣大臣官員前往督率地方官成梁除道不惜帑金功成迅速又令道旁種樹以爲行人憩息之所復降旨交與該地方官隨時留心保護近聞官吏怠忽日漸廢弛低窪之地每多積水橋梁亦漸坼陷車輶難行道旁所種柳樹殘缺未補且有附近兵民斫伐爲薪者此皆有司漫不經心而大吏不稽查訓誡之故也著傳諭該督撫等轉飭有司仍前整理或遇雨水泥

濬隨損隨修不得遲緩其應行補種柳樹之處按時補種並令文武官弁禁約兵民毋許任意戕害儻有不遵將官弁題參議處兵民從重治罪○壬申諭刑部獨子留養之條乃國家法外之仁而兇惡之徒往往恃有恩例肆意妄行或眾人共毆而推諉於一人或一人獨承以脫眾人之罪在無識之有司又以姑息爲寬大遷就具獄種種弊端難以悉數是以每年奏請獨子留養之案甚多凡殺人者抵償乃天理人情之正或其中情有可原而曲從寬典此又體古帝王罪疑惟輕之意隨事酌量者若不論情罪輕重而但以獨子概令從寬已非情理之當況其間未必盡係獨子乎有罪之人僥倖漏網恐成長奸之漸但定例已久朕不便遽行改易且不教而殺有所不忍著通行曉諭內外軍民人等己身既爲獨子更當思念父母無依謹身奉法以遠刑辟若好勇鬪狠怙惡不

梭數年之後獨子傷人之案仍復不減朕惟有執法抵罪以懲兇
頑不能曲爲寬假也此旨著通行宣布務令遠鄉僻壤之人咸使
聞知○甲戌喬世臣來京陛見以孫國璽署江蘇巡撫由左副都御史署

○丁丑諭辦理軍機大臣等兵部尙書性桂內閣學士雙喜著往
北路軍營與原任工部侍郎巴秦協理軍需事務○戊寅貴州提
督哈元生奏九股頑苗悖叛臣奉命進剿擒獲兇逆首犯一百九
名見交撫臣收審其餘軍前斬戮俘獲約計數千至悔罪投誠者
准其安插軍威大振苗蠻畏服但剿撫初定應駐重兵彈壓除台
拱營制兵一千外暫留官兵三千分布防範其所調湖廣廣西官
兵酌量撤回得旨據奏九股頑苗蕩平其善後事宜著該督撫會

同哈元生悉心定議具奏

東華錄

雍正二十三

臣王先謙敬編

臣周潤蕃恭校

秋七月庚辰朔諭辦理軍機大臣等據侍衛達哈蘇奏稱科爾沁公喇嘛扎布旗分並無牲畜其貧苦人等止有六月至八月米糧今年種穀無多又經亢旱無收等語朕思此所種之穀即使全收亦不足養贍數千人口恐致饑餓流散不可不豫爲籌畫伊等與何處相近卽動支彼處米穀賑濟及如何養贍俾其過冬之處爾等查議具奏尋議科爾沁公喇嘛扎布旗分貧苦人等共六千六百有奇今年十月至來年八月約計口糧共需米七千八百餘石與白都訥相近除將白都訥存米五千石支給外餘請酌給銀兩資其養贍再來年耕種時籽種不足者並請給銀令戶部派筆帖

式一員將銀運送辦理從之○吏部等衙門議准原署兩江總督尹繼善奏兩淮鹽政事宜一淮南三江營地方舊設鹽捕同知不足以資彈壓請改設巡道一督緝揚州通州各屬暨鹽城阜甯靖江等縣鹽務以重職任一儀徵縣之青山頭請立一專營設守備一把總一外委把總一兵一百名江都縣之馬家橋甘泉縣之邵伯鎮北塘僧道橋各添設把總一兵三十名分駐巡緝一淮所掣鹽重地向屬淮安分司經營嗣後請令督臣會同鹽政選委賢能府佐監掣一揚州府之搜鹽廳地方緊要請於通省佐雜或試用候補人員內揀選一員會同揚州武弁協力盤查一淮南所屬之泰壩淮北所屬之場關大伊關永豐壩烏沙河湖口泗州天場兩關俱係私梟出沒隘口請於通省佐雜內揀員管理其淮南各員歸新設道員管轄淮北各員就近歸淮徐二道管轄從之○辛巳

諭內閣禮部侍郎杭奕祿係朕特差稽查沿邊營伍之大臣理宜
體恤弁兵潔己奉公以副委任乃聞其沿途驕奢放縱擾累兵民
甚屬濶職著革職○禁止直省將軍督撫提鎮於經制外濫給外
委千把總牌札○癸未湖南觀風整俗使李徵緣事革職裁觀風
整俗使缺○乙酉大學士陳元龍以年老乞休得旨大學士陳元
龍老成練達學問優長奉職多年宣勞中外朕念聖祖仁皇帝
簡用舊臣晉秩綸扉俾承恩眷今以年逾八旬乞休情詞懇切朕
勉從所請著加太子太傅銜以原官致仕令伊子翰林院編修陳
邦直隨歸侍養起程之日賞給酒膳果品著六部滿漢堂官餞送
沿途官弁迎送盡禮○丙戌諭內閣聞上年秋月江南沿海地方
海潮泛溢蘇松常州近水居民偶值水患其本地紳衿士庶中有
雇覓船隻救濟者有捐輸銀米賚賑者今年夏閒時疫偶作紳衿

等復捐施方藥資助米糧似此拯災扶困之心不愧古人任恤之
誼風俗醇厚甚屬可嘉著該督撫宣旨褒獎將捐助多者照例具
題議敘少者給與扁額登記檔冊免其差徭並造冊報部○諭據
署湖廣提督張正興奏四月初六日常德府城內民居失火延燒
兵民房屋二百餘戶朕屢降諭旨令各地方有司豫備救火之具
遇有不虞卽竭力搶救此非不可以人力撲滅者今常德民居偶
爾失火遂至延燒房屋如此之多是該地方救火之具平日並未
畱心而搶救又不用力可知矣湖廣如此他省可知著傳旨通行
曉諭嗣後儻仍復疏忽因一二家失火而延燒多戶者定將該地
方官從重議處該督撫一併察議○戊子以順承親王錫保調度
無方坐失機宜命平郡王福彭代爲定邊大將軍○己丑戶部議
覆協理直隸總督顧琮奏直屬向無額設獄囚口糧以致瘐斃不

少嗣後請一體准設得旨依議在獄囚犯舊例俱給口糧止因各省額設之項有無多寡不同有司奉行不一卽間有州縣官自行捐助亦不可以爲常著通行各省督撫藩臬悉心詳查若府州縣額設之項歲有餘糧則當分給於不足之府州縣若本地原無額設之項或額數不敷應卽公同酌量動支存公銀兩覈實散給令監犯日食有資不至飢餓儻有刑書禁卒剋扣等弊一經發覺將該管官員一併議處○江南副總河西柱奏江南通州所屬范隄修築告竣各場籠戶感戴國恩情願急公效力請將原發工價銀兩繳還運庫得旨朕發帑修理范隄原係保護鹽場加恩籠丁之意所用工價銀兩何用伊等捐輸著出示曉諭照數給還勿使不肖官吏人等侵蝕中飽○庚寅諭辦理軍機大臣等前因大將軍傅爾丹輕進失利順承親王錫保在察罕叟爾調撥兵丁防範科

布多俱屬安協是以朕格外加恩晉封親王授爲大將軍及去年
賊兵來犯錫保竟不豫備奏稱撥兵一萬令赴烏孫珠爾而所到
之兵僅有三千又將領兵之將軍傅爾丹畱於大營致賊直越克
爾森齊老始遇額駙策凌將軍塔爾岱等奮勇截殺一面差人呈
報令其速發援兵而錫保不卽發兵俟丹津多爾濟到後始遣赴
援丹津多爾濟行未十里卽棄營住歇是時額駙策凌等與賊拒
戰二日知援兵不至始各收兵回營坐失機會錫保自爲大將軍
以來每聞賊至輒驚惶無措兵丁時撤時撥二年之內馬匹傷損
數萬闔營無不怨恨夫身膺大將軍之任賊來不能邀擊及深入
之後又令免脫此皆調遣失宜怯懦畏葸之所致也深負朕簡用
之恩理宜從重治罪姑念其前歲在科布多尙能籌畫整備著暫
革去大將軍親王其順承郡王查應襲之人承襲熙良世子之爵

亦著革去見命多羅平郡王爲定邊大將軍俟到軍營時著錫保
聽平郡王指示效力贖罪如仍前玩忽經平郡王參奏定行從重
治罪丹津多爾濟乃喀爾喀一微末台吉蒙 聖祖仁皇帝施恩
教育承襲伊父扎薩克貝勒朕御極之初封爲郡王嗣因採買馬
駝效力晉封親王屢加恩眷去年厄爾得尼招大敗賊人之時伊
捏奏冒功朕賞以墨爾根巴圖魯之號賜與黃帶子封其子多爾
濟色布騰爲世子乃於克爾森齊老領兵救援時故意遲延行至
十里卽安營住歇旋撤兵回營及厄爾得尼招接戰之時額駙策
凌領右翼官兵奮勇衝擊已將賊兵殲殺殆盡而丹津多爾濟坐
擁左翼官兵觀望不前次只放人皆欲急行追擊伊又枝梧逗留
致賊由杭愛山後逃遁伊並不尾追轉由杭愛山之南繞道遲延
致誤大事且數年以來所辦馬駝甚屬不堪理應將丹津多爾濟

從重治罪但念伊從前採買馬匹曾經效力暫行寬免著削去巴圖魯之號將伊子之世子革退撤回黃帶子革去親王授爲郡王仍畱喀爾喀副將軍之任辦理未完馬匹之事協助大將軍平郡王料理蒙古事務儻不實心效力仍蹈前轍定行從重治罪冊卜登原係扎薩克公先因追擒脫逃之吳梁海羅卜藏西拉布等著有勞績格外加恩晉封貝勒嗣因捏奏蘇克阿爾達胡並厄爾得尼招等處擊賊功績朕賞以巴圖魯之號賜與黃帶子晉封郡王今實情畢露方知伊帶兵一千遇百餘賊寇卽恐懼不前故張聲勢俾賊遠遁又同塔爾岱領兵追賊証言迷路縱賊遠颺並無爲國效力實心著革去郡王仍授爲貝勒撤回黃帶子其巴圖魯之號亦著革去令往科布多軍前效力贖罪儻仍前退縮瞻顧定行從重治罪○甲午吏部議准升任奉天府府尹楊超曾條奏設官

分理事宜一裁復州通判缺改設復州知州一學正一吏目一裁
義州巡檢缺改設義州知州一吏目一並將土默特耕地民人附
入義州民籍一金州請設爲縣裁原設巡檢缺添設知縣一典史
一一奉天府治中請照各府管糧廳分管糧務理事通判照各府
督捕廳專司督緝如有失察逃盜等案照例議處從之尋定金州
新改縣曰甯海○乙未諭內閣大學士孫柱八旬衰邁著以原官
致仕○庚子轉舒喜爲禮部左侍郎以畱保爲禮部右侍郎由詹事遷
○四川潼川州鹽亭縣麒麟生○乙巳吏部議覆署刑部尚書承
恩公慶復奏一向例刑部督捕司設有前後二司督捕一廳請歸
併爲一司以專責成除滿漢司官四員仍照舊例外其筆帖式八
員內請撤回二員一江南一司員少事多請分爲江蘇安徽二司
辦理滿司官除舊撥四員外請再撥二員漢司官除郎中原設二

員外請添設員外郎一主事一各司案件繁多請照工部例設督催所派滿漢司官各二筆帖式二專管登記查催從之○賑江西大庾等十一縣被水饑民

八月己酉朔諭內閣貝子允祐著同莊親王學習辦理正黃旗滿洲事務貝勒允禧著同果親王學習辦理鑲紅旗滿洲事務○兵部等衙門議准福建總督郝玉麟奏臺灣營制事宜一臺灣遠隔重洋民番雜處請於府治增置城守營設參將一守備一千總二把總四兵一千名防守府庫倉獄並分駐鎮標南北兩路各汛所有鎮標原設三營之兵撥派各汛者全數撤回府治以資彈壓一南路原設參將一守備一千總二把總四兵一千名不敷防範分撥之用請將駐菜山猪毛口守備改爲下淡水營都司僉書再添設千總一把總二兵五百名合原設弁兵分駐山猪毛口阿里港

新闢萬丹鳳山縣治鳳彈下埤頭攀桂橋觀音山石井等處一北路延袤千有餘里原設參將一守備一千總二把總四兵一千一百二十名亦不足分防彈壓請改參將爲副將再添設都司一守備一千總四把總八兵一千二百八十名分中左右三營以都司爲中軍守備爲左右二營分駐諸羅縣治及斗六門竹腳藔笨港鹽水港彰化縣治猫霧拺篷山竹塹中港後壠南崁淡水等汎其臺協水師原撥笨港鹽水二汎兵丁仍撤回水汎一安平地方外控海洋內扼臺郡實係脣齒之區請設立礮架七座並酌量起蓋倉廩貯粟三萬石以資兵餉一臺屬田地丁口漸增請將各處莊民編造保甲其各番社鄉保暨通事俱嚴加選擇勿令姦匪充當並設立社學延請優行生員教導以化愚蒙舊習一臺屬流寓人等內有人材出眾從前隨征效力者請給外委功加劄付卽委爲

社長約束居民三年無過准與內地兵丁以把總相間補用一臺
灣孤懸海外總兵一官有統馭民番之責請照山陝沿邊之例改
爲挂印總兵官從之○甲寅諭內閣據山東巡撫岳濬奏東省歷
年耗羨銀兩見存庫銀七十五萬四千兩有零從前豫省奏有存
庫銀七十餘萬朕已降旨將豫省本年地丁錢糧蠲免四十萬兩
以加惠通省百姓今東省亦應一體加恩著將雍正十一年地丁
錢糧照豫省之例蠲免四十萬兩卽以存貯之耗羨照數撥補還
項該省督撫務飭有司實力奉行俾閭閻均霑實惠○乙卯諭領
侍衛內大臣等近御當差之親軍俱係由佐領內挑取之人若將
舊人挑爲前鋒恐致誤事嗣後親軍內未滿十年者准挑前鋒其
過十年者毋得挑取永著爲例○予故致仕大學士孫柱祭葬○
丙辰諭辦理軍機大臣據署甯遠大將軍查郎阿等奏稱庫爾墨

圖山地方有逆賊五十餘人來侵被我官兵奮力攻擊斬殺二十
餘人餘俱生擒未脫一騎等語此次經理調撥甚屬可嘉所有效
力人員俟查郎阿查明等次具奏到日再降諭旨數年以來因西
路將軍等辦理疏忽是以逆賊敢於玩視今賊兵經此番傷損必
懷畏懼或於今秋卽整兵侵犯西路或於冬天侵犯北路俱未可
知著傳諭查郎阿等令其詳悉籌畫辦理○大學士管翰林院掌
院事張廷玉等遵旨議奏新科庶吉士蒙恩議給廩餼謹酌每月
各給銀四兩五錢其器用什物向工部支取並撥給官房一所爲
敎習館令庶吉士等肄業其中新刊 上諭每人各賜一部內務
府所刊經史詩文每種頒發三部永遠存貯館內以資課習從之
○辛酉加賑直隸武強武邑二縣被水饑民○丁卯諭內閣直隸
河渠水利關繫國計民生朕悉心經理開濬河道修築隄工務令

宣洩有資閭閻獲福又特設正副總河董率其事以專責成因王
朝恩久歷外任且受朕深恩是以用爲總河界以畿輔河工之重
寄乃聞王朝恩自到任以來性好安逸不耐煩勞僅於運河一路
坐船勘驗工程其他各處從未親歷以致緊要之處隄岸殘缺水
道壅淤平時漫無覺察今夏雨水雖多旋卽晴霽並非久陰積澇
可比而薊運鄉等河及河閒天津之運道並順德廣平大名之百
泉滏陽漳河等處決口漫溢傷害田廬又如滄州甄河月隄潰決
並不奏聞希圖隱諱似此有忝職守深負朕恩著革職仍畱該地
方所有今年應賠工程銀兩悉於王朝恩名下追出還項其直隸
河道總督員缺著太常寺卿營田觀察使顧琮補授徐湛恩身爲
副總河不能協助辦理甚屬怠忽著革去副總河交與顧琮差遣
委用少有懈怠亦著嚴行參奏其副總河員缺著永定河道定柱

補授○戊辰諭辦理軍機大臣等據署陝西總督劉於義等奏吐魯番等處回民已移至安西男婦大小共八千一十三名口朕查從前回民自吐魯番移至塔爾那沁時共九千二百七十三名口今其中竟有病故例應扣除口糧但伊等甫到安西甯使之食用寬裕著仍照原數支給以示朕格外之恩至總管額敏和卓及伊親丁著照官員例支給粳米以示優異○諭兵部從前滿洲侍衛補用綠旗員缺乃朕鼓勵人材之意近觀所用滿洲人員能整頓營伍者無幾且綠旗應用之員甚多嗣後滿洲藍翎侍衛著仍在侍衛內行走揀選都司守備時不必帶領引見○己巳添設順天府四路捕盜同知衙門經制外委把總各一○甲戌吏部議淮湖廣總督邁柱奏湖北恩施縣忠建地方離縣寫遠請改爲忠建鎮添設巡檢一土司經歷寨一帶地方應添設經制外委把總各一

兵九十五名分汛防守從之○丁丑以觀音保爲理藩院額外侍郎科爾沁額駙

○吏部議准廣西巡撫金鉅奏太平府屬恩城州土知

州趙康祚緣事參革無人承襲請改土歸流隸崇善縣管轄裁恩城州吏目缺添設崇善縣縣丞一分駐彈壓徵解錢糧從之○是月免江南六安舒城宿州等縣衛雍正十年水災額賦有差

九月己卯湖以高其倅以總督銜管江蘇巡撫事趙宏恩署兩江總督鍾保署湖南巡撫由湖北布政使署○庚辰諭內閣朕御極以來時

時訓諭奉差考官諸臣秉公持正杜絕私情以爲國家培養人才之本幸奉差諸臣皆能仰體朕心恪遵朕訓屏除弊竇選拔眞才十年來試事肅清士論翕服朕屢向廷臣等嘉獎再三乃河南學政俞鴻圖原係查嗣庭案內獲罪之人朕格外寬宥復加任使諒伊必能感激黽勉考校公明以圖報效今據河東總督王士俊列

欽糾參贓私釀繫實出朕意料之外况當天下學政徵清之會而
俞鴻圖一人首先犯法納賄營私甚屬可惡俞鴻圖著革職差戶
部侍郎陳樹萱前往豫省會同總督王士俊將本內參奏情由及
有名人犯一併嚴審定擬具奏○辛巳鄧鍾岳緣事降調轉張廷
璐爲禮部左侍郎以史在甲爲禮部右侍郎由左副都御史遷○刑部等

衙門議准署甯遠大將軍查郎阿參奏總兵官曹勑奉派領兵哈
密縱賊失機飾詞捏報請在軍前正法梟示得旨曹勑著在軍前
卽行正法示眾○壬午添設福建臺灣府學及臺灣鳳山諸羅彰
化四縣學訓導各一○癸未諭內閣向來倉場事務廢弛已極乃
朕所親見者經理之初難於整頓是以定例將殫心供職之滿漢
監督三年任滿卽升以示鼓勵十年以來經朕留心整理又復時
時降旨訓飭屏除弊端今倉務漸次清釐無復從前之陋習嗣後

爲監督者但能謹守成規便可稱職亦不似從前之難於辦理矣
若仍三年任滿卽升似覺太優著大學士九卿會同倉場總督酌
量定擬具奏尋議各倉監督嗣後果能實心效力倉穀無虧滿監
督筆帖式三年差滿以小京官卽用仍按筆帖式論俸升用主事
漢監督候選道府同知知州及保舉學習人員三年差滿准以應
得之缺卽用如內有貢監生員無職銜可用者交吏部酌量議敘
其見任小京官歷俸淺者差滿准其加俸三年如歷俸已久者仍
按俸推升於升任內加二級至降革效力人員差滿著倉場總督
出具考語從之○辦理軍機大臣等議准署陝西總督劉於義奏
回民頭目奉旨賞給職銜請照伊等從前有功等次定品級之大
小將一等頭目給與正百戶職銜四等頭目給與副百戶職銜照
例頒給號紙從之○移廣西泗城府經歷駐天峩四甲添設照磨

一駐府治巡檢一駐平樂一甲永福縣縣丞一駐鹿寨村○乙酉
吏部遵旨議奏定例滿洲舉人選用小京官漢軍舉人選用知縣
從前漢軍舉人有冒入滿洲額內中式者以致內用外用任意趨
避嗣後請令各該旗於考試時將應考人員詳加分別開明咨送
順天府如仍有混行冒考中式者查出將咨送之該旗都統佐領
等官交部議處舉人革退從之○吏部議覆直隸總督李衛奏直
隸地方遼陽州縣事務殷繁所有佐雜官員宜酌量增改查故城
縣鄭家口景州龍華鎮河間縣景河鎮北魏村獻縣韓村南皮縣
舊縣鎮滄州孟村呂家橋鹽山縣楊二莊青縣杜林鎮天津縣葛
沽西沽等處請各添設巡檢一東明縣杜勝集請復設巡檢一吳
橋縣連窩驛交河縣新橋驛滄州甄河驛青縣流河驛乾甯驛靜
海縣奉新驛天津縣楊青驛武清縣楊村驛通州和合驛等驛丞

請兼巡檢職銜磁州州判請移駐彭城鎮其河間縣管河縣丞駐
張各莊清河縣管河縣丞駐油房鎮俱兼巡檢事務裁河間府稅
課大使缺其稅課歸經歷徵收再青縣之長蘆鎮改歸滄州南皮
縣之舊縣鎮改歸鹽山縣各就近管轄易州之黃土臺等十二村
改歸淶水縣黃莊司巡檢兼管其紫荆等八十六村以易州分駐
紫荆關之上陳驛驛丞兼巡檢職銜管理從之○辛卯諭內閣朕
已降旨諭祭賢良祠大學士張英於本籍大學士張廷玉著給假
數月於十月十三日起程回家舉行典禮張若靄著隨去其族中
子弟若有在京閒散職銜可以暫假者准其隨回襄事江蘇學政
張廷璐亦著給假暫回本縣其學政印務照例交與督臣代管俟
事竣仍回本任○癸巳以孫詔署湖北布政使凌燝署江西按察
使由御史署○丙申禮部題康親王崇安薨請照例遣官致祭二次造

墳立碑令宗人府議加謚號得旨著予祭一次○己亥移廣東高
明縣太平司巡檢駐三州墟○庚子諭刑部大臣爾等身爲大臣
須務其大者遠者如國家之水旱生民之凍餒最爲緊要一夫不
獲其所卽係朕與諸大臣之責至犯法論死本由其人自取原不
必過爲寬縱或謂刑官開釋罪人可以積陰德於子孫此大不然
如果秉公據法使刑皆當罪則慶流子孫此理之可必者如將殘
忍兇惡之人屈法姑容欲邀一己之福而令死者含冤於地下不
但不能致福且足以遺殃有罪之人法所難貸原不得任意從寬
也夫寬且不可任意而況於嚴乎朕處事惟至公無私據案件而
論其事之是非初不先存一毫意見至於平日不能化導使不犯
罪朕與諸臣方且抱愧斷無以不殺人爲刑措之理朕見之最真
最切特與爾諸大臣言之○辛丑諭內閣直隸總督李衛參奏戶

部尙書鄂爾奇著革職交與果親王允禮理藩院侍郎莽鵠立戶
部侍郎海望左都御史張照吏部侍郎鄂善會同秉公審理○王
寅 上御洞明堂閱秋審湖廣等省情實招冊諭刑部曰爾等所
進秋審冊俱經細加酌勘擬定情實但此內有一縫可生之機爾
等亦當陳奏蓋在秋審定擬時自當執法而在句到時儻有可寬
之處又當原情二者原不相背斷不可因已定情實欲符前奏難
以更改遂隱默不復奏也執法原情總歸於大公至當而已閱畢
又諭曰朕閱招冊得寬一犯便心意順適若不能寬便覺不快諸
臣白同此心卽質之天下之人自亦同此心斷未有以多殺一犯
爲快者但犯人情罪必實有可寬之處而後予以矜全此心順適
方出於自然若犯人情罪萬無可宥勉強求一時之順適屈法從
寬致令惡人無所儆懼恣肆妄行則罹於法網者必多皆此姑息

之一念貽之害也辟以止辟欲求斯民之遷善遠罪正不得暫圖一時之順適耳○甲辰改四川瀘州協左右兩營守備爲都司僉書增設達建寺營于總一

冬十月壬子諭內閣今年各省秋審人犯有不應緩決之案經九卿改爲情實者甚多甚爲允協督撫通省大僚臬司刑名總匯錄囚定獄何等重大之事豈可一味因徇苟且如各省督撫臬司執法科罪而九卿詳請平反或九卿據法定議而朕酌奪從寬如此方合政體豈有執法之官而任意於法外徇縱者乎督撫旣如此定議若九卿不行改正則朕亦無如之何將使殺人者不死而國法不伸刑罰不中矣今九卿雖經改正然不將至當不易之理明白曉諭督撫臬司中識見鄙陋者或謂九卿定議務從苛刻稍存迎合之意遂於可矜可緩之案槩以情實奏讞其流弊尤不可言

爾等將改正各案逐一查明通行申飭俾各省督撫臬司嗣後悉心定擬庶於政體允合稱朕明刑欽恤之至意○癸丑諭刑部盜犯越獄傷人兇惡已極而撫臬擬以緩決殊爲失當朕前言凡爲大臣須務其大者遠者如善良之民至於凍餒老者不得遂其養幼孤不得遂其長何等可憐可憫之事是朕之責亦卽諸大臣之責也比之活一兇殘之人孰重孰輕孰是孰非乃今人識見蒙蔽每謂寬宥一人可以積德蔭及子孫不知寬縱兇殘之人以沽仁厚便非公正之道朕此心止有一公字十一年以來行事大臣等所共知共見若能以朕之心辦理天下國家之事朕實嘉賴焉○甲寅諭內閣各省商牙雜稅額設牙帖俱由藩司衙門頒發不許州縣濫給所以防增添之弊不使貽累於商民也近聞各省牙帖歲有增添卽如各集場中有雜貨小販向來無籍牙行者今槩行

給帖而市井姦牙遂恃此把持抽分利息是集場多一牙戶商民
卽多一苦累甚非平價通商之本意著直省督撫飭令各該藩司
因地制宜著爲定額報部存案不許有司任意增添嗣後止將額
內退帖頂補之處查明換給再有新開集場應設牙行者酌定名
數給發亦報部存案庶貿易小民可永除牙行苛索之弊矣○調
慶復爲戶部尙書以馬禮善署刑部尙書忠達公○復設直隸大名
順德廣平兵備道一兼管河道工程以河閒天津二府分巡事務
歸天津河道兼管其永平一府通薊遵化三州三河武清甯河寶
坻四縣歸通永河道兼管保定正定二府及直隸五州歸清河道
兼管添設保定府糧捕通判一駐府城天津府糧捕通判駐滄州
○乙卯改四川重慶府屬之黔江縣隸重慶府分駐黔江同知管
轄兼轄附近彭水一縣升府屬之忠州爲直隸州管轄墊江鄧都

及夔州屬之梁山三縣移順慶府通判駐鄰水縣豐和場甯遠府西昌縣縣丞駐禮州所添設打箭爐同知衙門照磨一○丙辰大學士張廷玉給假南回賜帑金一萬兩爲祠宇祭祀之用並賜

御用冠帶衣裘及貂皮人襪內紵等物頒給內府蓄籍五十二種

交與江南織造高斌從官艘運至桐城本籍○壬戌裁畱浙江杭

湖二府漕糧各五萬石存貯本處備用其歸安烏程二縣應徵漕

米命折價解部○命果親王允禮管戶部事○以喬世臣爲左副

都御史

原任江蘇巡撫

○癸亥以富德爲額外內閣學士○丙寅諭內閣

原任巡撫伊都立辦理進剿科布多兵糧著授額外侍郎○己巳

調托時爲戶部右侍郎常有爲工部右侍郎○賑山東德州恩縣

等十州縣水災饑民○庚午諭理藩院鄂爾多斯扎薩克公齊旺

班珠爾羅卜藏深悔上年軍營疏忽之愆此次效力勤勞著加恩

給還固山貝子之職

十一月丁亥賜孫宗夏等一百一人武進士及第出身有差○戊子命彭維新等稽察京通各倉○壬辰諭內閣大學士嵇曾筠自簡任河道總督以來整理有方調度合宜朕念伊父之忠義伊母之節操雖已贈卽褒旌尙未膺一品封典今特沛殊恩著給與大學士應得誥封以示優眷○乙未安南國王嗣子黎維祐遣陪臣訃告故王黎維祿喪並請襲封貢方物○戊戌正藍旗漢軍都統公慶復等遵旨議覆八旗世職絕嗣人員有以近族遼族子孫爲後者有以親戚收養爲後者其從前立功所得世職應分別降等令其承襲至墳墓在盛京及不知墳墓所在者旣無人承管祭奠應無庸承襲得旨朕加恩絕嗣人員爲之立後賞給世職令其承襲皆念伊等勳勞不忍聽其血食斷絕也其墳墓在盛京而承襲

世職之人在京當差者如情願往盛京居住卽令移住盛京隨彼處當差至不知墳墓所在者亦可立墳祭奠著一體加恩賞給世職令其承襲○己亥諭內閣年來江南河工因總河諸臣經營有方調度得宜實已湖河奠定民慶安瀾但河防關繫重大將來河務必得通曉熟練之人遵循分理斯克繼前功而全河形勢非平日講求親身閱歷必不能胸有成算洞曉機宜卽修防堵築以及估工查料等事亦非經練熟諳備悉利弊必不能隨時損益有裨工程是通曉河務之員不可不豫爲儲備也著每年在各部院揀選賢能勤慎司官二員帶領引見派往江南學習河務酌量委辦估工查料等事以二年爲期出具考語咨回本任如有操守才具實堪任用卽行保奏畱工酌量題補其不堪學習者不必拘定二年於試用數月後卽咨回原任另行派員前往學習如此數年後

通曉熟練者自不乏員於河工諸務大有裨益矣○辛丑以楊馝署湖北布政使偉璣署陝西西安按察使由湖北德安府知府署○癸卯以福敏署刑部尙書由左都御史署○甲辰命果毅公訥親在辦理軍機處行走○升直隸保定府屬易州爲直隸州以保定府之淶水及山西之廣昌二縣隸之

十二月壬子宗人府奏請襲封順承郡王爵得旨熙良著襲封多羅順承郡王代伊父錫保效力贖罪○徐士林緣事降調以郭朝鼎爲江蘇按察使由福建漳道遷○乙卯命四川巡撫憲德來京陞見○免山東高唐鄒平等二十七州縣本年分旱災額賦有差○丙辰添設廣東廣州府佛山鎮同知一移佛山鎮都司駐大灣干總移彩陽里五斗口司巡檢駐平洲○戊午諭內閣從前廣東巡撫鄂彌達條奏臺灣地方僻處海口向無城池宜建築城垣礮臺以

資保障經大學士等議令福建督撫妥議具奏今據郝玉麟等奏稱臺灣建城工費浩繁請於見定城基之外買備茨竹栽植數層根深蟠結可資捍衛再於茨竹圍內建造城垣工作亦易興舉等語郝玉麟不過慮其地濱大海土疏沙淤工費浩繁成工非易故有茨竹藩籬之議殊不知城垣之設所以防外患如必當建城雖重費何惜而臺灣變亂率自內生非禦外寇比不但城可以不建且建城實有所不可也臺郡門戶曰鹿耳門與府治近號稱天險港容三舟傍皆巨石鋒棱如劍戟舟行失尺寸頃刻沈沒內設礮臺可恃以爲固其法最善從前平定鄭克塽朱一貴皆乘風潮舟行入港水高港平眾艘奔赴無所阻礙大兵一入卽獲安平港之巨舟賊無去路而撫其府市人民南路商賈一聞官軍至絡繹捆載而來相依以自保物力既充軍氣自倍賊進不能勝退無可

守各島獸散終無所逃遁故旬日可以坐定向使賊眾有城可據
收府治人民財物以自固大兵雖入攻之不拔坐守安平曠日相
持克敵不易蓋重洋形勢與內地異此卽明效大驗固未可更議
建置也若謂臺灣築城卽以禦臺灣外寇是又不然從前兩征臺
灣皆先整兵泊舟於澎湖之南風澳以候風潮風潮之便歲不過
一時時不過數日若盜賊竊發或外番窺伺泊舟澎湖則夕至而
朝捕之矣至南北二路可通之地雖多然如南路之蟾港北路之
八掌溪海翁港鹿仔港甲西二林三林中港竹塹篷山惟小舟可
入其巨港大舟可入者不過南路之打狗中港北路之上淡水其
次則北路之笨港鹹水港去府治較遠縱有外寇亦取道於此備
設礮臺派撥汛兵朝夕巡視自足以資控禦今郝玉麟等請於見
定城基之外栽種茨竹藉爲藩籬實因地制宜甚有裨益其淡水

等處礮臺務須建造各屬並應增修不可惜費省工或致潦草應
如何舉行之處著該督撫妥協定議具奏○己未彭維新緣事解
任調史貽直爲戶部尙書仍署陝西西安巡撫涂天相爲兵部尙
書以張照爲刑部尙書徐本爲左都御史王紘爲安徽巡撫調刁
承祖爲浙江布政使以盧焯爲河南布政使張鳴鈞爲河南按察
使由江南太
通道遷○俞兆晨緣事解任調陳樹萱爲戶部左侍郎韓光
基爲工部左侍郎趙殿最爲戶部右侍郎由工部右
侍郎調○累親王允
禮等奏直隸總督李衛參奏鄂爾奇一案臣等遵旨審理鄂爾奇
所犯之罪例止革職但伊受皇上重恩有負任使應請加倍治
罪得旨鄂爾奇受朕深恩有玷職守大負伊兄鄂爾泰之教訓理
宜從重治罪朕念鄂爾泰裨益國家政務甚多以之相抵所請將
鄂爾奇加倍治罪之處著從寬免○移福建興化府倉大使一駐

福州府管理常豐倉務其興化府倉務改歸經歷管理○免江南

泰州常熟金山等二十六州縣衛雍正十年分水災額賦有差○

庚申以憲德爲工部尙書鄂昌爲四川巡撫由陝西甘肅布政使遷○轉畱

保爲禮部左侍郎以鍾保爲禮部右侍郎仍署湖南巡撫李世倬

爲湖北布政使齊式爲陝西甘肅按察使由肅州道遷○以謝旻爲工

部右侍郎常安爲江西巡撫馮光裕爲貴州布政使徐嘉賓爲雲

南按察使由廣西梧州道遷○以碩色爲陝西西安巡撫楊馝爲陝西西

安布政使何師儉爲陝西西安按察使由西安驛傳道遷○實授劉章浙

江按察使○辛酉諭八旗都統等嗣後承襲世職之年幼子弟著

該旗大臣等加意照看成全造就遇大臣等升轉時亦必傳諭接

任大臣此朕特恩務令年幼子弟均需實惠如大臣有不遵行者

經朕查出必加倍治罪○壬戌諭內閣各省保送優生內廩增生

俱准作歲貢附生准作監生入監肄業其武生於到部時禮部考試騎射具奏請旨○以高斌署江南河道總督由兩淮鹽政署○福建觀

風整俗使劉師恕患病解任裁觀風整俗使缺○癸亥以禮部尚

書吳襄兼管左都御史事○添設湖南湘陰縣新市鎮巡檢一○

甲子添設江南安徽甯池太廣道一駐紮安慶其滁和二州分巡

事務歸廬鳳道管理○改福建督標水師營遊擊爲參將○丁卯

馮景夏因病解任以喬世臣爲刑部左侍郎由左副都御史遷○以凌如

煥爲內閣學士

由翰林院侍讀學士遷

○戊辰大學士等議准直隸總督李

衛奏直隸新募之兵二千名請分爲督標前後二營每營轄兵一千名各設遊擊一中軍守備一千總二把總四外委千總三外委

把總五俱歸中軍副將轄從之○是月免山東高唐鄒平等州江
西新淦等縣本年及江南泰州常熟金山等州縣衛雍正十年被

災額賦有差○是歲人丁戶口二千五百四十一萬二千二百八十九又永不加賦滋生人丁九十三萬六千四百八十六田地山蕩畦地八百八十九萬四百十六頃四十畝有奇徵銀二千九百八十七萬二千三百三十二兩六錢有奇米豆麥四百七十九萬三百五十二石有奇草五百五十六萬三千一百十三束茶三四萬二千三百五十一引行鹽五百二十三萬三千八百五十六引徵課銀三百九十八萬八千八百五十一兩有奇鑄錢六萬八千四百三十六萬二千有奇